

YUTE Ai koyoto epi'ehina fayahi

¹ Yuteita nani Yesu Kilisitohi kele kele'a to Yemesihi gona'amofita, afotifu Hu'mau elesa molo lepito komopa'a lepilata nohina'mu lenele'mo moloto Yesu Kilisitohi kabalo lenele'mo molo'ehinamo lenali fayahi ya'ma koyoto nolepube.

² Hu'mau komopa'a lepilata nohina to fuluna'a to keke'i lu lepololata'na ya'ma li futili hu lepenogo minomo buto mineno.

Faga faga mono'i fi lehetete nelina bona'magihi
hapa'animu lu epi'ehina

³ Keke'i nolu lepolona bona'ise. Nani Hu'mau lenubuto bilata nasana silaga bona'magi hiti lilata nohuta yana'mu fayahi koyoto lepilube luto amuya molo'ohunaya, to bona'magi kehelii ule'ale huse'namofifi kapo'a mino hetofa huto minalibe luto Hu'mau lu limi'ehina kaga ya'ma sibi hu lalibe luto asaga'nalogam amuya melete foya'a ule'ale hite li etalana lenogo'na bito fayahi koyo lepilube luto kana'ni tupa nohibe. ⁴ Hena'mube? Bona'i luga'a Hu'mamofifi kehelii'ahana'a enali folagahatigu fenene hite ti'ahana. To enali moko foya lilata nehanalo Hu'mau ka melemekilina'mu yabe lite ai hetofa bo nohinagihe lite nelana enali ya lite Hu'mamofifi lehe'mose kaga'a li sibi hite to lali moneko kaba boti, Yesu Kilisitohi enemegesa

hu emite ibe fitebe hi etelata nehabe. Enali ya'ma bite li he'mila ete li he'mila nehanamofhi hapa'anilo Hu'mau osahi epilina ka koyapa'i mono bukugu fayahi keye'ahanamo ni'ibe.

⁵ Lenali ya'ma ka'a keheli su he'ahanamo anamofipoaku'i lu lepilube'mu nohube. Hu'mau ai ya'ma ligiko lagako bona'i Isilaeli bona'i Iyipi metogati gulu ho epoloto to luga'a aliha'a aitoga meminese to agoya hu meemi'ahana'amagihi enoho fili su ho'ehinamo ni'ibe. ⁶ To agelo mone'amagi enali kaba foya'ani he'mite nohi hepa'aniloti he'mite hi'ahana'a enali'i Hu'mau ule'ale seni nagatu li sipi tuto sa gi epoloto afeha'alo ema metepunagu enele'mo he'mi'ehigo enali kana sipilo ka foya lilina kanamofhi geba hite neminana'a yamofhi beto hite kehelilo. ⁷ To Sotomu to Gomola to nohi hepa'i luga luga mino lito buto oto hu'ehina hepato boana'i beto hilo. Enali ana hite anamofhi hite haya kelete moko fako nasanalo li huto hilago logo amuya moloto minoba minoba nohinagu he'mi epalago nehana nebabe. Yamofhi bu nogotogo lelesati gofa lilina'mu yabe ya suhi hu epolo'ehinamo ni'inagi yana'mu lenegekesu meheno.

⁸ Ya hu epolo'ehinamo ni'inaya aku'i faga mono'i lilata nehana bona'i enali ana hite bamu'i be ge tegi hite enugufatu topa helata'na lilata nehabe. Ya nehite Hu'mau gihti bo libe pigi bibe hite kokulumalugu gulu guluna'ani hiti bona'i enali ya'ma mumusopa i epelelata nehabe. ⁹ Agelomagiji bo enogo'anifu Mikaeliu ya'ma faga mono'i lilata nehana bona'i hi'ahana suhi huto mehu'ehibe. Ai Mosehi sekuya'a ki'afu

lilibe lite Satahi kenasabo biletē ihega ahēga
helete Satahi ka'a foipa hilibe luto keheli'ehina,
ya'ma keta higo ai Satahi megeka meluse ma
luto luloto lu emi'ehina: Sipi Bo aliha'a ka ke-
mekilina'mu yabe luto lu emi'ehina. ¹⁰ Aku'i
enali faga faga mono ka lilata bona'magi ya'ma
mekeheli'ahana nasana'mu yamofahi ibe fitebe
hite to megeka lite minelata nehabe. Yaga kala
suhi hite enugufa'ani enumu nofilina nasana'mu
fa'mene komopa'anitu kehelilete yalo ya'ma
foipa hilete yanauba enele'mo sibi sibi hite ya
hinogo enali fili su halabe. ¹¹ Akae. Enali
minete ya'ma hena hena hilana ni'ibe? Enali
Atahi pana'a Keniu foipa kapo'alo bu'ehina'a
ya'ma kapolo bilana suhi hite ya nehabe. To
efaha fe'nopofihi laga'a kehelite lite minete Bal-
amuhi kapolo ya'ma me'me hite nebabe. To
Kolau ai Hu'mau lu'ehina ka'amofahi pelesa ito
he'mi'ehina ana hite kegeiyo hilete'ani yanauba
enele'mo laba hinogo fililana'mu yabe. ¹² Bona'i
ya hana'amagihi lenali mono kamofahi gomolu
nose'na li gehesalo'i ya'ma yaga nose'namu ha
ha lite neheti'ahana enubuya mehu'ehina enali
enigi'ani le'mo napa napa hite li gehesamo le'mo
sibina nehabe. Enali enubu enekesa meni'igo
enali'ani nasana'muko anasi keheli keheli ne-
habe. Enabagaguti kele yau yau hinaga nelabe.
Enali ya'ma ko fato fato hite sopopo ya'ma
fa'mene yasiuba li he'migo buto fa'menena
lolo hulata nohina ya suhi hite melete nehana
yanauba gusunupa'a meni'ina suhi lolo hulata
nohibe. To yafa mone nose'na legeya'a holata
kanalo legeya'a mehalina'mu yabe. Ya suhi hite

enali nehabe. To yafa mone su ti'ahago bi'ehina ya'ma enali hi'ahana suhi hite minese'nalo ne-habe. ¹³ To enali hege nagami'i kele'a amuya'a hiti minago libi'na kele'na huto kolota kolota huto hulata nohibe. Enali bona'i ya hana'amofahi foipana'ani enubuya huse'na ya suhi huto huto hulata nohibe. Sonofi'i luga'amagi enali sibigopa nagopa hite humofa'na hilata nehana enali kapo meenelepilana'mu yabe. Sonofi'i ya hana suhi hite nehana bona'i ya'ma sinih gise'namofahi komopa'agu ule'alena'a ya'ma Hu'mau le'mo nupa huto metepu hepato lolo huloto ya'ma minoba minoba huse'nagu he'mi epolo'ehinamo ni'ibe.

¹⁴ To Atahi giko gakomagi nekisa'agati huto hite bi'ahana huto hilago yalo alih'a ana huto bihu 7 Inoki huto hu'ehina. Ai ya'ma faga fagalo bona'i ya hana'a enali kumu fono ka luto ma luto lu'ehina: *Bu galo. Sipi Bouba ya foipana hana bona'magihi nona'a epilube luto hetofa agelo bona'a babu luto ka foya lilana li gehesalo enele'moto limilina'mu yabe.* ¹⁵ *Ya huloto asaga bonatoga hapa'ani lu huto nohuto kegeiyo bona'i Hu'mamofitoga meneminana'a enali kegeiyo'na'animofahi hapa'a nona'a foipana epilina'mu yabe.* To kegeiyo bona'magihi Hu'mamofitoga meneminana'amagi enali Hu'mamofahi kaga li sibina sabana hite ka laga mehina'a lilana ananamofahi nona'a epilina'mu yabe. ¹⁶ Bona'i ya hana'a enali megeka lilata to fato bona'i enifisa ilata nehana to moko tako fato fato'mofahi lolo hite minete, enali'anigo li nupa napa hite neminana bona'i enali luga'a hiti ana kapolo enemege'i melete bilabe lite

enofokehi lite fi taga hi epelete lite hilata nehabe.

Enegekesa lito kaga lu epolo'ehina

17 To nemehi lepi'ohuna bona'ise. Lenali ya'ma koyapa'i Sipi Boti Yesu Kilisitohi aposolo bona'magi enali kohe tete kaga'a lu lepi'ahanamo yana'mu kehelite minalo. **18** Enali ma lite lu lepilata hi'ahanamo ni'ibe: Kana'a sipi tupu higo komopa'anigu foipanamofhi nasanalo ya'ma laga epesise'namo amuya melelata nehana bona'i huto hilete kalana'i mele lepelete mono katini lite mumusopa ilana'mu yabe. **19** Bona'i ya hana'amagi ya'ma Hu'mamofhi naga'a loko huse'na li huto hilata nehabe. Hu'mamofhi Sikalafu'a hiti menehana enali enugufa'aniuba kaba hu epololago laga'ani epesise'nalo melelata nehana. **20** Ya hite nehanaya, komopa'ni lepi'ohuna bona'ise, lenali monotini legeya'a yanauba komopatini lolo hilenogo amuya melete mineme bite minalabe. Hu'mamofhi fana meha'a hiti Sikalafu'i limi'ehinamofhi amuya'alo minete Hu'mamofitoga lite minalo. **21** Ya nehite Sipi Boti Yesu Kilisitou ai fuluna'a molo lepoloto ule'ale huto mino kosaba'i ya'ma minomo bulata nasana molo lepalalina'mu geba hite nehite Hu'mau komopa'a lepi'ehina'alo minalo.

22 Hu'mamofhi ka keheli bati mehise loe lae enegekesa neyigma bona'i leniginaga fi epilo.

23 Enali logo kapogu bilune'mu haha nelana bona'i enele'mo tiligi salo. To bona'i luga'a leniginaga nefinogo lenelesa nolinogo enele'mo bati hilo. Ya nehite ana'ina'ani kolota kolota hapa'ani ni'inogomo yana hiti kaba hi epalalo.

Hu'mamofi kumu fokehi ho'ehina ka'a

²⁴ To Hu'mau lenele'mo hetofa hu'ehigo lele'mo laba hi lalabe lite sekele mamu'a hiti fana mehena'alo foipanatini meminenogo ya nehinogo gobisa'alo lenegelo bise'na hiti amuya'a hiti lenele'mo malalibe. ²⁵ Sipi Boti Yesu Kilisito kumu yabe luto lubuto bilina bo Hu'mamofihu aitoga sekele mamu'a hiti fana mehena to amuyana'a hiti to kaba hulata amuya'a, koyapa kana'a mino'ehina to yatai hiti ana huto li'ehina to mino lito buto mino bai toto minalina'mu yabe. Lama'naka.

**Ka Lamana'a Mono'i Lu Mu Tifi'ehina Ka
Yabe**
**The New Testament in the Benabena Language of
Papua New Guinea**
Nupela Testamen long tokples Benabena

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

PDF generated using Haiola and XeLaTeX on 11 Nov 2022 from source files
dated 9 Oct 2020

429cb299-5ab9-51c4-8857-9de5c72f8388